



TAPAK 7

Norway linük nung atalokbaji shisadangtsüla: Manish Tewari



TAPAK 8

Biden-i Trump indang sentong kar melenshitsütsü

VOL. XVIII NO. 94 (ADOK 94) DIMAPUR

TENTONÜ (MONDAY) AENJETI (JANUARY) 18, 2021

₹ 5.00

Malware app ka ajanga nisung 40,000 ashiochtsürtem apu

Guwahati, January 17 (Agencies): Nisung 40,000 shi ka nungi malware apps ajanga sen crore aika külakzüka agiba atema Delhi Police indang Cyber Cell-i China tsür ana den Tibet nunger ka dena nisung 12 puogo.

Iba telok yagi nisungtem nem parnok indang marketing scheme apps download südaksü aser sen crore aika külakokja agi. Parnok indang app nung malware dena liasü aser app enokba sülen social media influencers ama kümdaksü.

"Delhi Police indang CyPAD Unit-i China nunger ana den nisung 10 apu. Parnok yagi online nung malicious App tamajung ka amshia Indian Users' devices nung tim masüba mapa inyak. Parnoki mejangjaba nisungtem indang Social Media (FB, Insta & YT) accounts sülen anidakdaksü" ta DCP Cybercrime, Delhi-i ashi.

"Tesüiba ita ana tsüngda iba telok yagi nisung 40,000 shi ka ashiochtsüogo" ta Deputy commissioner of police (Cyber

Cell) Anyesh Roy-i ashi.

"Bank account balala nungi Rs 4.75 crore shi ka noktangogo aser China nunger ana ket nungi Rs 25 lakh bena lia puogo" ta paisa ashi.

China tsür anaji arishi küm 27 tain Chaohong Deng Daoyong aser arishi küm 54 tain Wu Jiazhi na lir. Tena ya China kübok Sichuan province nungi lir ta jangjaogo.

Iba telok yagi WhatsApp ajanga link ka prokshia nübertem nem malware apps download südaksü. Iba sülen parnoki nisungtem dang parnok indang app (malware) nung minute 30 shi mapang endokra anogoshia sen tajangzük agütsütsü ta shia ashiochtsü, ta Delhi Police-i metetdaksü.

Minute 30 shi app amshidang parnoki nisungtem dang Facebook, YouTube aser Instagram nung internet celebrity tem ajungketsü ashi.

Maneni tarutsü anogotem iba ken o dak sendakba nung nisung aika aputsü, ta police-isa metetdaksüogo.

Assam, Meghalaya aser Tripura tzüsü temealem ala

Guwahati, January 17 (Agencies): Deobarnü northeast state 3- Assam, Meghalaya aser Tripura nung tzüsü temealem ala.

Deobarnep nungi Assam, Meghalaya aser Tripura nung tzüsü temealem agi longbang. Tanep 8:30 ako meta Tripura

yimtiba Agartala nung visibility ji 50 metres liasü, ta Indian Meteorological Department (IMD)-i metetdaksü.

Külen, tanep 8:30 ako meta Assam kübok Tezpur aser Dibrugarh nung visibility ji 200 metres liasü, ta parnokisa ashi.

COVID-19 Nagaland: Nisung 12,058 nungi 11,713 taneptsü nguogo

Kohima, January 17 (TYO): Deobarnü Nagaland nung nisung pezü dak COVID-19 aliba putetba züngsema nisung ajak agi 12,058 kümogo. Maneni, tanü parnok nisung 4 taneptsü angu.

"Tanü Dimapur, Kohima, Mokokchung aser Tuensang nung nisung kaka dak COVID-19 aliba putet" ta Health & Family Welfare Minister, S Pangnyu Phom-i ashi.

"Maneni Dimapur aser Kohima nung nisung anana taneptsü angu aser parnok züngsema taneptsü angur ajak agi 11,713 kümogo" ta paisa metetdaksü.

Nagaland nung tang COVID-19 agi shiranger nisung 116 anepaludar, ta Minister Pangnyu-isa shisem.

Nagaland nung COVID-19nungi taneptsü angubaji 97.14% lir, ta Health Department-ia metetdaksü.

Nagaland nung COVID-19 puteta alir nisung 88 süogo. Tasürtem rongnung parnok 78 coronavirus ajanga aser 10 tanga timtem ajanga asü. Maneni nisung

141 tashi tanga state temi ogo, ta parnokisa ashi.

District balala nung COVID-19 putetba: Dimapur (6,453), Kohima (3,773), Mon (605), Peren (504), Tuensang (245), Mokokchung (190), Zunheboto (142), Phek (47), Kiphire (41), Wokha (39) aser Longleng (19).

"Nisung 12,058 rongnung Traced Contacts 4,971, armed forces personnel 4,661, tanga state tem nungi arur 1,854 aser Frontline Workers 572 lir" ta Health Department-isa metetdaksü.

District balala nung tang anepalurtem: Dimapur (47), Kohima (56), Mokokchung (10), Peren (2) aser Mon (1).

"Tang anepalurtem rongnung nisung 11 dak shirangba yimya terara lir, nisung ana oxygen agidar aser 2 ICU nung anepaludar. Nisung 101 dakbo shirangba yimya kecha mali" ta COVID-19 bulletin nung shia lir.

Taneptsü angurtem: Dimapur (6,273), Kohima (3,660), Mon (593),

Peren (499), Tuensang (243), Mokokchung (171), Zunheboto (139), Phek (50), Kiphire (40), Wokha (35) aser Longleng (10).

Nagaland nung COVID-19 alitsü akok ta temolung melemi bilemba sample 1,23,029 tendangogo. RT-PCR ajanga sample 72,865, TrueNat ajanga sample 36,953 aser Rapid Antigen Test ajanga sample 13,211 tendangogo.

TANÜ NUNGI COVID-19 VACCINEAGÜTSÜTSÜ:

Tanü Deobar anogo asüba agi Nagaland nung COVID-19 vaccination drive dak sendakba maparen kecha meinyak.

"Hombar nungi Nagaland kübok tesem 22 nung vaccination drive agütsü," ta State Immunization Officer, Dr Ritu Thurr-i ashi.

"Mezüng anogo nung healthcare workers 561 nem Covishield agütsüogo. District hospital 9 nung nisung 900 nem agütsütsü ta sentong aliba nungi nisung 561 nem vaccine agütsü" ta Dr Ritu-isa metetdaksü.

Nisung 17,000 nem vaccine agütsüogo: Union Health Ministry

New Delhi, January 17 (Agencies): India nung coronavirus vaccine agütsüba anogo tananübuba nung nisung 17,000 nem vaccine agütsüogo, ta Health Ministry-i Deobar nikongdang metetdaksü,

Tanü state 6 kübok tesem 553 nung Covid vaccine agütsü aser tang tashi nung nisung lakh 2.24 shi ka nem dose mezüngbuba agütsüogo ta Health Ministry-isa

ashi.

Deobarnü Covid vaccine agütsüba state temji Andhra Pradesh, Arunachal Pradesh, Karnataka, Kerala, Manipur aser Tamil Nadu liasü.

"State/Union Territory tem dang Routine Health Services nung tetsükdaksü majurutsü atema hopta nung anogo pezünü dang COVID vaccine agütsütsü shiogo. Tanü Deobar asüba agi

state 6 nung dang vaccine agütsü" ta Health Ministry Joint Secretary, Dr Manohar Agnani-i ashi.

State timba kati hopta nung anogo pezünü vaccine agütsütsü sentong renema lir, saka Goa aser Uttar Pradesh nungbo anogo anana, Mizoram nung anogo pungunü aser Andhra Pradesh nung troknü agütsütsü, ta ministry-i ashi.

Farm Laws: Punjab nungi aluyimer 2 Nagaland-i aru

Dimapur, January 17 (TYO): Punjab nungi aluyimertemi India nung Farm Laws asem anema lungkak aityonga arur aser India sorkari yangluba ozüngtem nung lendong keta aliba osangtem metetdaksütsü atema aluyimertemi linük kübok tesem balala sema senzür.

Yaküm November ita nungi Punjab aser Haryana nungi aluyimertemi farm laws 3 meyipa agütsü atema takhangba agüja lungkak aiter.

Nagaland nung aluyimertem den ajuruteptsü atema Honibarnü Punjab nungi aluyimer ana aser Assam nungi aluyimer ka Dimapur tonga aruogo.

Deobarnü Hotel Saramati nung tenati osangbener den jembidang "Punjab nungi aluyimertemi farm laws 3 aser MSP (Minimum Support Price) indang metetdaksünür, kechiyong linük nung aluyimer aikati iba ya memetet lir" ta ashi.

"November 26, 2020 nungi aluyimertemi Delhi nung lungkak aiter aser iba nung Punjab, Haryana aser Uttar Pradesh nungi aluyimertemi shilem agir. Centre sorkari ozüng asem meyipa magi



Deobarnü Hotel Saramati, Dimapur kima nung Punjab nungi aluyimertem- Manjinder Singh Randhawa aser Sukhjinda Singh Gill na den Assam nungi Abhilash Rajkhowa nungeri tangar den külemi agiba noksa ka angur. (Dimapur, January 17)

tashi onoki lungkak aittsü" ta Manjinder Singh Randhawa-i ashi.

"Tanga state tem nungibo aluyimertemi farm laws anema ola madoker ta Centre sorkari ashir saka onoki tanga state tem nungi aluyimertem den ajurutepta sensaksemdang parnoki MSP indang memetetba lemsatepogo. Anungji onoki farm laws indang osang tejangja metetdaksütsü atema tesem balala sema senzür" ta Manjinder-isa ashi.

"Onoki Supreme Court aser Constitution akhümtsübur saka Supreme Court-i tawa tentetba Committee magizüker, kechiyong ozüngtem agientsüba tashiji Centre ket nung lir. Centre-i farm laws yanglu anungji onoki Centre anema noktaker" ta paisa shisem.

Farm laws nung tamajung aika keta lir. Punjab aser Haryana nungi aluyimertemi dang MSP angur. Aluyimer aikati ibaji memetet aser tanga state tem nung

Mandis maliba ajanga aluyimertemi tajangzük mangur. Anungji onoki iba osang prokshir" ta Manjinder-isa metetdaksü.

"Punjab aser Haryana nungbo Government Mandis lir aser idakji yokdoker saka tanga state tem nungbo ibaji mali. Mandis maliba ajanga aluyimertemi jenjang tajung mangur aser takoksa ang bendenloker" ta paisa ashi.

"Farm laws tasentem ajanga

nija nisungtem ang tajangzük angutsü kechiyong parnok tax magütsütsü. Ozüng tasentem kübok aluyimertemi jenjang dalang agi dang ayoktsüsa akümtsü" ta Manjinder-isa metetdaksü.

Patiala nungi Manjinder Singh Randhawa aser Ferozpor nungi Sukhjinda Singh Gill nati January 6, 2021 nü Chandigarh nungi Scorpio gari ka nung apuso. Tenati Assam matongdang Uttar Pradesh, Bihar aser West Bengal semdanga liasü.

Tena Guwahati atongba sülen Assam nungi Abhilash Rajkhowa-i Northeast nung osang prokshitsü atema tena den yaritepatsü atema mein. Abhilash ya yaküm Punjab University nungi masters züngtemogo.

Punjab nungi aruba aluyimer ana nem Bharatiya Farmers Agro Business Development Cooperative Ltd. Nagaland chapter-i teyari agütsü aser tanü osangbener senden nung tir PH Tripathi den züngsemtem aden.

Deobarnü Nagaland nung mapa tembangba sülen aluyimertemi Manipur-i apusoa ogo.

Old Changsu Baptist Church pur küm 100 jungmung mungogo



Dimapur, Aenjeti/January 17 (TYO): Deobarnü Old Changsu Baptist Church pur arogo tenzüker küm 100 ajungba anogomung nung Nagaland Deputy Chief Minister, Y. Patton-i salem lemsatepa liasü.

Jubilee ya taoba mapang aibelena aliba temenen tatok nangzüka, tatok agüja Tulusang Tsüngrem tematiba jenjang nung sentsüwangshitsüba mapang ka lir, ta Patton-i ashi.

Pai arogopur dang Khristan yimya nung alitsü ayongzüker aser küm 100 liyonga arudang Old Changsu yimtsüng nung alirtem Tsüngremi temoatsü nung len aniba asoshia tenüngsang agütsütsü ashi.

Temoatsü ajunga ya 1919 küm yimtsüng nungi Khristan yimsü mezüng agizükertem ajanga lir, ta tenüngsang agüja Dy. CM-i item dak nungi jakzüker aser kinungertem dang pelaba lemsatepa liasü.

Paisa lanurtem dang shisaliok wadang nung tali tenendakba nung zünga competitive exam tem nung jenjang tajung ngutetsü ayongzüka liasü. Iba dak sendakba nung pai Old Changsu yimtsüng nungi competitive exam agütsütsü tejangraba alir nisung kar coaching class agidaksütsü nangzüker.

Paisa Centennial Jubilee nungtem nung theology azüngtsü tejangraba alir kaketshir ana graduate süa züngdaksütsü nangzüka liasü.

"Lanurtem temesepba chiyongtsü nungi pila alitsüla, kechiaser item chiyongtsütem yagi temang raksatsüba kisüng masü saka tarutsü wadang dena raksatsür," ta Dy. Chief Minister, Y. Patton-i ashi.

Patton-isa NPSC aser UPSC nung takok angur nem senotsü teyari agütsütsü ta nangzüka competitive exam agütsütsü jangrartem ajungmesoa liasü.

Deputy Chief Minister, Y. Patton ya PWD (R&B) indang in-charge lir aser pai Old Changsu Baptist Church Centennial Jubilee nungtem nung süngkum nungi tenzüka Vankhosung nung aliba Witter Bible College campus tashi lenmang black-top küm ana tsüngta yoktsü nangzüker.

Tobu yimtsüng nung Assam Rifles temi teyari balala agütsü



Dimapur, Aenjeti/January 17 (TYO): IGAR (N) kübok Assam Rifles, Tuensang Battalion ajanga 2020-2021

financial year atema Assam Rifles Civic Action Programme kübok Mon district nung aliba Tobu yimtsüng nung alir

matamabensar nem Wheel Chair aser hearing aid tema lema agütsüba sentong ka ayongzüka liasü.

Iba sentong nung yimtsüng ketdangsürtem, yimdaklir aser Assam Rifles nungi züngsemtem dena liasü. Tobu region kübok yimtsüng ketdangsürtem aser teshimtet nübutem adenshia lia ESM, teintet rogo aser yimdaklir nem wheel chair aser hearing aid tem agüja liasü.

Yimtsüng nung matamabensartem takum jenjang tajungba kumdaksütsü asoshi Assam Rifles temi iba ama mera tajung agiba atema nüburtemi pelaba lemsatepogo.

Lanurtem Indian Army nung adentsü ayongzükerba sentong agi



Dimapur, Aenjeti/January 17 (TYO): IGAR (North) kübok Assam Rifles, Jalukie Battalion ajanga Government Higher Senior Secondary School, Peren nung Join Indian Army Campaign ka ayongzüka agia liasü.

Rangapahar military station

nung Army recruitment alitsüba indang iba sentong nung security forces temi osang tejangja lemsatep. Iba recruitment mapang nungdakba tabu balala indang metetdaksü. Ajidang masü kaketshir dang Indian Army nung Officer jenjang nung tenzüksü atema

NDA/CDS/OTA amala yimyatem indang lemsatepa liasü.

Kaketshir nem selection procedure, academic eligibility aser physical standard tem indanag metetadaksü. Iba sentong nung kaketshir 92 dena liasü.

Kohima DPDB senden nung VAC osang agitep

Dimapur, Aenjeti/January 17 (TYO): Kohima District Planning and Development Board (DPDB) pur 2021 küm atema mezügbuba senden ya January 15, 2021 nü DPBD indang Conference Hall, Kohima nung mena liasü, kong Advisor, Urban Development and Municipal Affairs, Dr. Niekiesalie Nicky Kire aser Advisor to CM, Technical Education and Election, Medo Yhokha nungera dena liasü. Iba senden ya Deputy Commissioner aser Vice Chairman DPDB, Mohammed Ali Shihab A IAS menden sür agia liasü.

Iba senden nung taoba senden nung lemtetbatem lepa reprangshi aser iba sülen Village Adoption Committee (VAC) indang onük benoka jembia liasü.

2019-2020 aser 2020-2021 indang VAC inyakyim ya March 31, 2021 nung tembangtsü, ta DPO aser Member Secretary DPDB, Pudusul Lugo-i metetdaksü aser Committee dang March 31, 2021 tashinung report agütsütsü shia liasü.

Dr. Nicky ya 9-Kohima Town A/C indang Advisor ka asünung, Committee ajanga inyaksangshiba maparen kar indang lemsatep aser adopted ward kübok mera kar agitsü indang shia liasü. Pai DPDB senden nung züngsem timba adentsü ayongzüker aser district relnoktsü atema tarutsü nunga maneni shisa tajung lemsateptsü ajungshia liasü.

Assam Rifles temi COVID awareness & medical camp ayongzüker



Dimapur, Aenjeti/January 17 (TYO): IGAR (North) kübok Assam Rifles Battalion ajanga Samzuiram nung January 17, 2021 nü medical camp ka ayongzüka katsü.

Medical team ajanga iba yimtsüng nung alirtem temang angati repranga mozü agütsü aser kasa mapang COVID-19 tashidak nungi jenbua alitsü, temang mürekmejutsü yimyatem sayua liasü. Iba camp nung yimtaklir nisung 182 arua tajangzüker balala ngua liasü.

COVID-19 tashidak wara poktetba sülen sorkar meyang

Advisor Medo Yhokha iba senden nung mezügbuba dena züngsem den pelaba lemsatepa liasü. 14th Southern Angami-I A/C kübok taoba VACs nung pa sendaktepba indang bilemteta jembiba mapang VAC atema senotsü tataktet ka dang agüjaka mapang tajung jenti inyakogo, ta ashi.

Iba committee ya sorkar indang agency aser ambassador ka ama shilem agir aser iba ya ajanga nüburtem den yimtsüng tashinung sendakteptsür, anungji committee yagi maparen balala ajanga nüburtem khuret angateta inyaktsüla, ta ajungshia liasü.

EE Power Kohima, Er. Ruokuongutuo Suohu aser ADC Chiephobozou, Vekhoyi Chakhesang natia 8th Western Angami A/C aser 11th Northern Angami A/C nung committee ajanga inyakba indang osang agüja liasü.

Iba senden nung society registration atema application asem agüja aliba indang benoka jembir Screening Committee nem tanaben jangjashia osang agütsütsü nungloktsü.

CMO Kohima, Dr. Vezokholua senden nung adener den COVID-19 tensa indang lemsatepa liasü. WHO Consultant, Dr. Shila-ia COVID-19 Vaccine Introduction indang PowerPoint presentation agüja liasü.

Taruba DPBD senden nung PWD (R&B) aser Land Resources Department ajanga department inyakyim indang osang agütsütsü nungloktsü.

health agency tem ajungalen teinyaktsü agi sünger aliba mapang yimtaklir nem angati medical teyari agütsütsü nükjidong nung iba camp ya ayongzüka liasü.

Iba camp nung tanur 30 nem medical teyari balala agütsü. Kasa mapang parnoki teintet rogo aser kinü tanurtem balaka anepalu aser COVID-19 awareness indang nüburtem nem angatetdaksü.

Iba camp nung shilem agirtem nem Assam Rifles ajanga süngo talem jemdakja liasü.



Küm 70 tema süia aruba sülen Arunachal Pradesh Chief Minister Pema Khandu-i Major Bob Khathing nem tetushi agüja nüngshilung ka yanglutsü ta osang metetdaksüogo. Indian Army officer Major Bob Khathing-i sepai telok tila ka anir China den arrtsüa aliba Tawang tesem atsünga agi. February 14, 2021 nü Tawang nung Major Bob Khathing indang nüngshilung yanglutsü atema lung azüngtsü ta CM Pema Khandu-i ashi.

Assam nunger ka Uttarakhand Tea Development Board nung shim

Jorhat, January 17, 2021 (Agencies): Tocklai nung Tea Research Association kübok Tocklai Tea Research Institute indang chief advisory officer Pradip Baruah Uttarakhand Tea Development Board, government of Uttarakhand indang board of directors nung shimogo.

"Uttarakhand indang tea industry tasen nung yariteptsü asoshi kü nem iba jenjang lempzüksüba asoshi pelar aser nümatanga bilemer" ta Baruah-i ashi.

"Ni Tocklai nung dang alitsü

saka nüngdakba mapang board senden nung adentsü. Kü mapaji, Uttarakhand nung lapoka aliba tea industry maparen achaayangba tsütsü tetuyubatem agütsütsü," ta paisa ashi.

Uttarakhand Tea Development Board aser iba nung shimteter nübu ajak Tea Research Association indang züngsemtem lir.

Baruah ya tea industry wadang tsütsü küm 30 dak tema inyaka aruba nisung ka lir.

Pai "Tea: A Wonder Drink

for Health and Wellness,' aser 'Pioneering Indigenous tea planters of Assam' densema süngo dak sendakba nung kaket balala züluogo.

Arem süngo (wild tea) indang germplasm wazüka ayutsü asoshi achaayangba maparen nunga pa dena lir.

Küm 100 dak tema Tocklai Tea Research Institute, koba taoba mapang Tocklai Experimental Station liasü, iba ya alima nung tea research institute tejenba alitsü, koba British yimsüsüba mapang amenokba institute ka lir.

Mazbat MLA Boro-i mapatong 3 atema lung azüngtsü

Tangla, January 17 (Agencies): Mazbat MLA Charan Boro-i Deobarnü Udalguri district nung mapatong asem inyaksü atema lung azüngtsüogo.

Boro ya Udalguri district Gudi Bathou Afad nung advisor lir aser pai Bathou o Kheraisalip

nung visitor's restrooms anaprong ya Assam Darshan Scheme kübok inyaksü.

Iba mapatong ya Rs 10 lakh endoka yanglutsü.

Boro-isa Bathou Kheraisali, Kanthalguri nung link road ka yanglutsü atema lung azüngtsü.

Iba mapatong atema Rs 1.3 crore lempzüksüogo. Mapatong

anaprong ya Assam Darshan Scheme kübok inyaksü.

Mazbat MLA Boro-isa Udalguri district kübok Gorhmara, Kajiamati nung Bathou mandir indang atsü yanglutsü atema lung azüngtsü. Iba ya MLALAD fund ajanga yanglutsü.

Silchar nung tesayur ka anema ken o benok



Guwahati, January 17 (Agencies): Silchar nung college tesayur kati Prime Minister Narendra Modi, Haryana Chief Minister Manohar Lal Khattar aser Haryana Deputy Chief Minister Dushyant Chautala nunger anema social media nung o prokshiba atema FIR ka benokogo.

Ramanuj Gupta Junior

College nung tesayur Tamojit Saha-i social media nung Prime Minister aser Haryana yimsüsürtem mezügmeshia o prokshir ta Silchar Sadar police station nung Snehangshu Bhattacharjee-i ken o ka benok.

Snehangshu ya Akhil Bharatiya Vidyarthi Parishad (ABVP), Gurucharan College unit nung tir lir.

Tamojit-i Facebook nung Bengali oshi agi 'Haryana nung aluyimertem maparen ajanga kongshiba' ta sür prokshi. Iba nung Prime Minister aser Haryana yimsüsürtem dak tsüngsem agi azük yanglur semtsüba noksa ka sayua lir, ta Snehangshu-i ashi.

Tamojit ya Public School Road, Silchar nung alir saka police-i pa ano mapu lir.

Sikkim nungi Delhi tashi tayimtsü senzütsü

Gangtok, January 17, 2021 (Agencies): Northeast nung regional connectivity ajungkettsütsü nükjidong nung SpiceJet-i Delhi nungi Sikkim tashi anogoshia non-stop flight tenzüksü sangdongogo.

Delhi aser Gangtok, Sikkim tsüngda anogoshia flight service ya January 23, 2021 nungi tenzüksü.

Iba flight service ya Gangtok, Sikkim kübok Pakyong Airport nungi senzütsü. Sikkim nung commercial flight achaayangba civil airport ji Pakyong Airport dang lir.

Delhi aser Sikkim tsüngda anogoshia indangindanga senzüba airline ji SpiceJet mezüng alitsü.

Delhi-Pakyong-Delhi route atema SpiceJet-i Bombardier

Q400 tayimtsü ka agütsütsü. Iba mapatong dak sendakba nung, SpiceJet indang Chairman aser Managing Director, Ajay Singh-i, "Pakyong aser Leh sendaktepa New Delhi tashi flight tasen tenzüksütsü maongka anguba atema onok pelar. India nung ajaki sapua semdangba aser tepor tajung tesem rongnung Sikkim ka alitsü," ta ashi.

"Delhi nungi Pakyong (Gangtok) tashi iba flight tenzüksüba ajanga Himalaya tenemtsüng nung aliba tepor tajung tesemtem semdangtsü asoshi senzüsenbonger aser raliwalirtem tali atsüa arutsü," ta Ajay Singh-i shisem.

Delhi-Pakyong aser Pakyong-Delhi atema paraji Rs 4310 asütsü, ta SpiceJet-i metetdaksü.

Bishalgarh nung Tripura Congress tir amak



Agartala, January 17 (Agencies): Deobarnü Tripura kübok Sepahijala district nung nisung kari Tripura Congress tir Pijush Biswas amak.

Biswas-i Bishalgarh nung party sentong ka nung adentsü atema aodang nisung kari Congress office jakdang pa amak aser gari raksatsü.

Iba sülen police aser party züngsemtemi pa Bishalgarh hospital-i anir ao.

Iba lendong ya police lia atalok ta Biswas-i ashi.

"BJP-i yaria nisung kari ni amakdang, police ketdangsür kati ni kümzüksü merang saka nisungtem jagi pa dak azük" ta Biswas-i ashi.

Nisungtem jagi süng aser yintem agi pa indang gari raksatsü ta Biswas-isa shisem.

Parnokisa iba tesem nung Congress züngsem tenet-ti ka dak azük.

Congress lennir Biswas-i Bishalgarh Police Station nung ken o ka benokogo.

"Tripura nung tang aliba BJP sorkar ya taoba CPIM dang nungi tamajungba lir. BJP züngsemtemi opposition lennirtem aser züngsemtem dak teka sangshir" ta Biswas-i ashi.

Yaküm December ita nisung kari CPIM state committee member Pabitra Kar'er ki amak.

Champhai nung Assam Rifles-i heroin apu

Aizawl, January 17, 2021 (Agencies): Mizoram kübok Champhai district nung Assam Rifles-i sen lakh 40 dak tema alang heroin mozü apu.

Iba heroin mozü tuozük gram 101.3 liasü aser Champhai district kübok Zokhawthar tesem nung Assam Rifles indang Serchhip Battalion-i mita aoba mapang tenokdangba mozü ya ngutet.

Iba mozü benshiba maparen dak sendakba nung Assam Rifles-i nisung ka puogo. Pua alisang den külemi pa ket nungi ngutetba mozü ajak excise & Narcotics Department,

Zokhawthar nung agütsüogo. "General Area Zokhawthar nung iba amala maparen inyaker nisung senzüba Assam Rifles indang surveillance team-i osang angazüka paji apu. Team-i pa ket nungi sapon asepa pungdang 8 nung heroin No 4 alepbanger bena aliba apu," ta Assam Rifles sangdong ajanga metetdaksü.

"Temesepba mozü shibelenba maparen ya Mizoram state, tongtibangsa India-Myanmar arrtsü tesemtem atema tebilemtsü tuluka kümogo," ta Assam Rifles-i shisem.



TIR YIMYIM YIMOBILEM (EDITORIAL)

DIMAPUR TENTONÜ, AENJETI (JANUARY) 18, 2021

COVID DANG TAMAJUNGBA

Covid-19 tashidak nokdangtsü asoshi yaküm küm piyong asenok ajaki pei akok shilem agiogo. Ibai asenok ajak asoshi tenük agi manguba tsükchir tesashi den raraba tongpang tuluka liasü. Tongpang tesashi rarar asünungji, asenok ajak pei pei yari anibelem aika agiogo aser rongsen nunga takoksa jenti ajuruogo. Ajisüaka, tashidak wara ya dang nokdangtetra asenok anibelem aser takoksa ajakji amadoker, ano akhi ama jangratema alitsü teimla nung asenok ajaki shilem agidagi. Atangji, asenoki Covid-19 tashidak mesenji mangu aser asenok aikati iba tashidak agi meshirangdang, anungji tiyazü amato bilemer aser olulu aika proker. Ajisüaka, asenoki jungjunga bilemdangra, alima nung asenok dang nungi kanga agia techiraba, temetetba aser shisakar nisung aika lir. Itemjibo asenok dang nungi tekümdangba alir aser parnokibo mesenji angur aser tashidak indangji jungjunga meteta lir, anungji iba tashidak wara mesen tepsettsü asoshi nükenbelem kanga agia mozü bushitettsü meranger aser bushitetogo. Itemji melamelaa mebelemi angati ngutetba, yanglutetba aser inyaktetba mapa ka masü. Joko, asen lima tashi Covid-19 nokdangba mozü bener arua agitsü tenzükbaji asenok ajak asoshi mulung anisüngzük anguba mapang ka lir. Ajisüaka, iba ama mozü ngutetba atema tengutetter aser teyanglutetter scientist-tem aser Tsüngrem tenüng sanga agitsü melen, olulu tapu balala proka nisungtem ratadaksüba mapaji Covid-19 tashidak mesen dang nungi kanga agia tamajungba lir. Science ajanga ngutetba mozü nem masü saka item ama olulu nem asenok kokdaksüra, Covid-19 tashidak wara poktetba agi masü saka olulu poktetba agi nisungtem aika taküm samatsü. Ano, olulu rongnunga ajak dang tamajungtiba aser lendong tulutibaji Yisu tenüng amer tiyazü shinba ya asütsü. Nagaland nung arogo ka nung anogo 40 lumia sarasademer külen lumia sarasademer rongnung kari anguba mangdang nung Covid-19 tashidak nokdangtsü asoshi mozü yangluteta akabaji agira, temang nung moiing number 666 ajenadoktsü aser molumii aotsü ta tashi shintetba Naga nunger tamangerji asenok asoshi kanga tekümdangtsü lir. Nagaland nungsa tesem kar nungbo kanga shirangba agi taneptsü bushia ao nung, yangji sarasademtsürtemi anogo ishika lumitsüang ashiba agi lumiseta asüba otsüa ataloka lir. Item ama makmakshimadaksüba nisung aser tanüla tamajung aliba agi, tenyar Paul-i Timoti dang "Tsüngremi asenok nem ya tetsübu tanüla masü saka tashi ain, temeim aser tajung-majung aser shitak-meshitak metettsüsa tangatetba shisatsü agüja lir," ta ashiba asenoki 2 Timoti 1:7 nung shia aliba angutsü. Iba Tsüngremi agütsüba tashi ain, temeim aser tangatetba tekolok aser shisatsüji amshia asenok alitsübaji tangsa tenüngdakba kümogo. Alima nung tamangba yimsü karibo tashidak aneptsü mozü yangluteta akaba nung ya mamanger, anungji shirangyonga mozü machir. Ajisüaka Yisuiibo tatishitsü jembidanga, "mozüji shiranger atema yanglu" ta ashiba asenoki angashiogo. Tangar tesümgangtsüka shisabolua, mibang nung, pei nübo aser rongsen endoka tendangpet tendanger nungdakba mozü yangluteta aka nung, iba mozüji agira Tsüngremi mepelatsü, anungji molumii aotsü ta shinra aser iba mozü jagi taneptsü masü saka temang nung timtemang agütsütsü ta pei bilemba agi shitak kümer olulu prokra, asenoki asen nübortem yaritsü melen ashioksür asütsü. Atangji, Covid ajem asütsüa akok mesüra tanga ajem asütsüa akok, mozüjem agir külen temang metaa shirangtsüa akok aser asenok aikati yamaji shirangdang alitsü, ibai tanga masü saka asen temang nung mozü jagi mapa inyaker ta bilemang ta yashiang All India Institute of Medical Sciences, New Delhi nung Director Dr.Randeep Guleria-ia asenok dang nenshia metetdaksüogo. Ibai olulu mesüra süng long dak amangba putu masü saka Science putu lir, anungji asenokbo olulu nung masü saka Tsüngrem dak amanga Science ajanga bushitetba tetuyuba nung anidakdi.

OLEMSABANG

NAGA LIMA AINKAR OLA AGI ANÜNGA KÜMOGO

~ Wati Longchar (Serampore)

(Yashi adok nungi...)

Covid-19 wara mapang teyazü ainkar aika adokogo. Karibo Israel nunger dak alaka, alima kin ajak Covid-19 wara agi atongtsü ta shin, saka Israel lima-a Covid-19i tongogo. Nagaland, Mizoram Khristan teimba aliba state asü nungji, mamanger dang Tsüngrem ain jungkai adoka sayutsü atema parnok Covid-19i nungi kümzüka ayutsü ta shinogo, saka Covid-19i tongogo. Yamaji teyazü ainkarji jungkai adoktsü.

Teyazü ainkartem anema Isaia, Ezekiel aser Yeremia ainkari aitsüba aser nüburtem dang parnok teyazü o tajung agi temesepdaksü ta ashiba angur. Shitakba ainkari Tsüngremi kechi ashir aji dang inyaksü. Tat.agi. Balaam ainkar nem Balak chubai hon, taribi aika agütsür Israel anema atakatema shintsü mepishi. Saka Balaami Tsüngremi kechi shiang ta ashir aji dang ashitsü ta noktaker aser pai punguben tashi chuba dang Tsüngremi atakatema masü nung ni koda sür Israel anema atakatemsü ta ashiba angur (Züng. Tapu 22 nungi 24 züngang). Baalam ainkar chubai rongsen agi malizüktet. Shitakba ainkartemi chuba madang süaka, tasütsü metsübui tekong meranga noktaker angur. Ochi asoshi Yisu nütsüngtema alinük tesen balala nungTsüngrem ochi o kuli asüdang tepsetba otsü nung azünger. Yamaji Tejen aser Tasen Lai anaprongla nungji ainkartemi takar, yimsüsür shirnoki Tsüngrem aser nübur anema inyaker, tat.agi, süngyanglu külemba, sensaker, lajar, tantsü-tambur aser ainer dang temeim mesayuba, ochi obendang magütsüba, süpokrem agiba, rongsen penpuba aser ashioksüba, a.a. temenentem tuteta, parnok dang Tsüngrem atakatema aser obendang arutsü ta shinba angur. Tsüngremi jatetba ainkari yamaji inyaksü.

Lokti yanglushiba nung Ainkar ola

Naga lima nung lokti tejakleni maobaji tenlaki sabang nungi, kaket-ken-o ajanga, lokti tentet balala nungi tasü tait ainkar ola makaba ajanga mainer. Joko Naga lima nung ochimashi mapa inyakbaji temenen ta arendaka mali, konang ka amaiang aikati inyaker aser jembir. Iba ama teraksa tensa ka nung arogo nung ainkar ola kong lir? Shisashir telok balala, tetsür tentet telok balala, hoho balala nungi ainkar ola kong lir? Yimtsüng yimden yimsüsür rongnung ainkar ola kong lir? Nisungji tabensaba mali, saka tesüiba mapang Rev. Longri, Rev. Riküm, Dr. Renthly Kietzar, Rev. Tsüknung, Rev. A. Temjen a.a. tasü ita jembiba ama tanü Naga lima tejakleni odaktsünera toklang tenzüker, lanurtemi ainkar ola adoktsü nungdaker.

Ainkar ola pulpit nungi dang masü, saka shisadokden balala, sensaksem sabang balala, kibok sensaksem, kaket, social media balala, skit, ken, poem, drama, salepsara/asaya menü o amai saka ochi jembiba a.a. Ano lenir shirnoki nübur ashioksia teyazü jembir parnok anema lokti ajungtsü asoshi tai tuteta sensamasatsüsbaji (mocking) tim dang. Iba dang ya "weapon of the oppressed" ta ajar. Kecha tashia nübur nungi itemji agentsü makok. Yimdeni özüng balala yangluaka nokdangtsü makok. Sen agia alizüktsü makok. Nübur nungi magintetba tashi ta ashitsü akok. Itemji ajanga lokti ajungtsü mechi ainkar ola adoktsü putu ta metetdi. "Black topping over night, pothole by sunrise. Wokha-Merapani Road" ta zülur Whatapp sabang ka nung nüburtemi teka agi black topping kaksa sayuba angu. Iba dangji lokti terenlok rakzükraktemba ta ajar. Pei lima meimertem, auür ta ajar. Contractor, nüjiso bushir aser yimden yimsüsür aija tapet temerenshi agüjang ta takhangba züluba ngua nia "YES" ta shir yutsü. Tenüng teta ochimashi mapa teinyak ta nüburi ashiba ola ka ta angatetdi. Rio-i aniba party NDDP adoker külen, pa CM mapa agizükli yimjak nung pai yamai ayimoktsüba Whatapp ka nung angu, "I stand before you to give a commitment. Starting with Kohima and Dimapur, we are going to build good road in one year time" ta ashi saka meinyaktetba ajanga menütsüba vedio ka angu. Pai nangzüka ama meinyaktet anungji menütsütsü tim. Tiyazü jembir aser ochi mashir sensamasaja menütsütsüba "right of the people". Ibajia tenüng teta ochimashi mapa tuteta sayuba maparen ka. Yamaji inyakyim balala ajanga tenüng teta aitsür, yanglushitsü ayonger ainkar ola aika nungdaker.

Nisung aikati Nagaland ya "Land of Unions" ta jembir. Lokti temenen anema raratsü, yanglushitsü aser tejakleni odaktsüba tentet aika nungdak. Saka telok tentet balala tenüng nung pei tenüng ajungkettsü, rongsen bushir telok tentet nungdak mali. Tat. agi., Naga Students' Federation aser Naga Mothers' Association amala Naga nunger rongnung telungjem adokdaksütsü, tejakleni anitsü aser yimjung atema tenzüker, saka sen, konang-naroküm arishiba ajanga ainkar ola mali akümer. Political party ka atsünga aiben jembiba ajanga ainkar ola madokteter. Naga nüjiso atema nokdaksü/raratsü ta sür Phizo-i anir NNC tenteta India Government den jembi, saka sen meimer aser Prime Minister, President, Minister aser army nung tulur dang kümnüba ajanga telok aika lemsaa ao. Meyiper lokti rajang kümdaksüba mesen tamajungtiba ka kümogo. Telok kechi südir süang, kodang konang-naroküm, rongsen dak rangloker inyakdir ainkar ola madoktettsü. Ano Tejen Lai putu nung ainkar telok (band of prophet) kümteta tasü tait aser ochi ola ayimoktsü. Yamala mesukba ainkar tenzüker rongnung matok tashi lokti nung temelenshi bener marutettsü. Temalen ACCAUT, talisa telok balalai tax meshiba, ochimashi mapa anema nokdakogo. DAYO-i mapang shia ochimashi mapa anema ola adokba ngua kanga pelar. Yamaji Naga nunger rangben ajungtsü asoshi lanurtemi jila aser yimtsüng ajak nung tenteta ainkar ola adok nungbo asen lima nung temelenshi tulu bener arutettsü. Telok balala dang ochi lemang tuyutsü, sayutsü, ajungmesotsü arogo jatet aser yamaji arogoi sayutettsüla.

METONGSHITSÜR

Jan. 17, 2021 adok Olemsabang tapak nung "Naga lima ainkar ola agi anünga kümogo" ta adokba nung "Teyazü Ainkar - Shitakba Ainkar" ta masü "Shitakba Ainkar - Teyazü Ainkar" ta tazünger metongshia azüngtsü mepishir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US aser UK nungi missionary temi India nung rangloker inyaker



Mission India-i tenzüksüba Arogo Tenla ki ka noksa nung angur.

Aenjeti/January 17, 2021: US aser UK nungi missionary temi India nung Khristan tamangba yimsü proktsü atema rangloker meranga inyaker; ajioda Evangelical Missionary temi parnok indang mission chart nung India map-a züngoka India nung lisopurtem den Khrista osangtajung lemsateper.

GoaChronicle investigations team-i ashiba agi, tang India nung Evangelical organization 110-i Arogo tasen tenzüksüba mission mapa inyakdar.

Süngjang ka ali nung remtsür süngdong tulu ka küma ainba sülen süngjang aika tangdaksütsü atema mangdang yur inyakba ama UK aser US nungi missionary temi India nung Arogotem ajanga Khristan yimsü proker.

India nung kanga nüngtugu missionary organization rongnung kaji Mission India lir.

"India nung nisung million 265 shii anogo nung nisung shia US sen 1.90 dak tajemba agi taküm alir aser parnok kanga sensak tia nung lir. India nung nisung pezü shia nungi nisung katibo azüngtsü mesüra zülutsü memetet, ibayongji parnoki tetsükdaksü aika ajurur. Yamaji India nung million aikati taküm nung timtem jenti ajangshia teimla ajak samar lia teküzmüker ka nüngdaker, ibayongji India nung sensakertem aser teimla malirtemi Yisu Khristai agütsüba teimla nüngdaker," ta Mission India-i metetdaksü.

Khrista missionary temi India nung rangloker inyaker, kechiyong Tsüngremi iba linük kanga meimer aser teimla maliba tesemtem nung Khrista osangtajung proktsü nüngdaker.

India nung nisung million 1,400 shi lir, aser iba nungjagi nisung million 400-ibo Yisu Khrista tenüng-a mangashidang, anungji osangtajung proktsü atema alu mena lir.

Gospel for India - Reach The Unreached At Any Cost-i ashiba agi, "India nung Gospel

for India-i inyakba ministry nükjidongji lanurtem aser nisung tasen nem Tsüngrem O angashidaksütsü atema lir aser Laishiba nung ajemdaker Arogotem tentettsütsü atema lir."

Iba mangdang yur Gospel for India-i missionary 502 India tesem balalai yok aser parnoki Arogo 200 shi tentettsüba den külemi home groups 700 dak tema tentettsüogo.

Glad Tidings India-ia, "India ya takar jenti aliba lima ka aser hon jenti aliba lima ka, ajisüaka India nung mazüng mashirtem-a jenti lir, tebok sünga mechiyungtetba nisungtem, talisa tanurtem aika lir, kar alar tia nung lir, ajaki sendokba nisung aika lir, nütsüng jenti lir aser tzü temerük mangurtem jenti aliba lima ka lir," ta metetdaksü.

Parnokisa, India nung tetsürtem alitsü majung, kechiyong iba linük nung tanur jenti raksaa indoker, tanur asüadang kibong kümdaksür aser tanur asodang asür jenti lir ta metetdaksü.

"Onoki 'unreached people groups' den inyaker, kechiyong parnoki taküm aliba Tsüngrem indang kodanga mangashidang, parnok iba akümli nung teimla kecha mali," ta Glad Tidings India-isa metetdaksü.

Christ for India-i ashiba agi, "Tangbo Andhra Pradesh, Kerala, Delhi, Orissa aser Chhattisgarh state tem nung Arogo 215 tentettsüogo aser item Arogotem nung züngsem 22,200 dak tema lir. Wadang nung nokdaka aliba pastor temji NTC-i yarir aser Arogoi pei sasa menokdaktet tashi NTC-i yarir. India nung pastor tem aikati teti atema tekülem ki yanglutsü atema sarasadem. India nung Tenla ki ka yanglutsü atema nai yaritsü asü? Tenla ki tongmelang ka yanglutsü atema nenoki teyari agütsütsü akok. Item Tenla kidang Tsüngrem külemtü, nütsüngsüba mapa inyaksü aser India nung metongjemi aliba tesemtem nung Yisu Khrista osangtajung proktsü," ta metetdaksü.

India nung 'Church Planting' organization-i talisa Dalit nungerdak rangloker inyaker.

Jordan Lewis Ministries-i ashiba agi, "India nung nisung million 160 dak tema (Dalits) dang "Untouchable" ajar aser parnok ya memerükba nisungtem ama züngshir. Parnok nem meimchir temeden magütsür."

Evangelical organization OM-i ashiba agi, parnoki India nung sensaker million aika yaritsü nüngdaker, talisa India nung teküboktiba jenjang nung aliba kin Dalit-Bahujan nisungtem yaritsü nüngdaker.

"India nung Dalit nungerd, sensakertem aser meshimejungertemi temeden atema ayimdener," ta Good Shepherd Church of India nung putir, Joseph D'souza-i metetdaksü.

"Loktiliba nung temelenshi nüngdaker aser tanela nung temelenshi nüngdaker. Iba ya tang putu nung alar tia den kasa lir. Parnoki (Dalits) meimchir akhümket akhanger," ta paisa shisem.

Global Outreach Mission-i parnok indang website ajanga, "Tarutsü nung Kibuba Tsüngrem meteter Dalit nungerd kibongtem asoshi Khristan school agütsütsü onok nükjidong lir. Parnok Khristan yimsü dangi meyipra joko parnok Dalit nungerd ama mezüngshitsü aser parnoki sorkar teyari menüngdaksü. India nung sensaktiba rogotemji parnok lir. Sorkaria parnok nem teyari magütsüba ajanga parnok ano tesensakba akümer. Dalit nungerd tanurtem nem angati shisaliok agütsütsü aser anüngdang chiyungdaksütsü atema onoki Khristan schools nüngdaker," ta metetdaksü.

India nungsa mission mapa inyakba tentet aika rongnung Love-n-Care Ministries International,

Advancing Native Missions, Reach All Nations, Mission Forefront, Empower Ministries, Christ for India aser Central India Christian densema lir.

ANO GO ABEN TSÜNGREM DEN

Tatok angütsü tatok agüjang Mathi 6:12


Agütsüba dang nungi agizüktsü senti rongsen ishika lir. Asenoki temenen khuret bener külen, shiba nem asenoki tai agütsü pai tesüngmangtsü ka tai tatok agütsü nüji kümdaksü. Tsüngrem dang sarasademba shia tatok meshitsü Yisui nütsüngtem dang sayu. Asenoki anogo shia Tsüngrem anema inyaker ta Yisui metetta liasü. Tsüngrem dang tatok memeshi asenoki anogo kata süidaktsütsü makok. Asenoki tangar dang tai atokba ama Tsüngremi asenok dang tai atoktsü ta yimlaang ta Yisui sayu (Matt. 6:15). Tatok agütsübaji Tsüngrem yimya (Anitet 34: 6-7). Asen ok Pa nütsüng asütsü Pa tsüngsü nung jajatsüla. Asenoki taochi makaba asen tsükchir dang tai metokttetra, asenoki kecha meinyaktet. Aibelen karbo asenoki tai matoktsüla ta Yisui mesayu. Asen mulungjang nung tatok magütsü ayutsübaji Lai tesayuba masü.

Nai kar nem tatok magütsü soeta yura ne tekülemji aser sarasademji amajok (Matt. 5: 23-24). Pauli Tesalonika nung aliba Khristantem dangi tasü aitsü ajungshia zülü (1 Tesa. 3:7). Parnoki koda meimtsü rasaa ashitsü asoshi parnoki Paul menüngdak kechiaser parnoki kati ka dang koda meimtsü Tsüngremi Pa temeim parnok dang sayu. Tsüngremi Pa temeim parnok nem agütsü, aser parnoki pa sullen anidakdang Pai Pa temeim rendaksütsü parnoki Tsüngrem meimtsü asakba kar ajurura, Tsüngremi Tanela Temeshi ajanga pa meimtsü parnok mulungjang nung ajungshitsü.

Tsüngremi Pa taochi nung asenok meimchir tashi mait nung yaritsü teyari leman renemtsü aser asenok rongnung kati ka dang meimtsü sayutsü Pai renema lir. Idakji kecha tependang mali. Tsüngremi ajak dang meimtsü asenok dang sayur.

Tangar meimtsü na timtema lir asü? Tsüngremi na yaritsü. Nai ne temeim tetezü aketba leman nung sayutsü memeteti lira, Tsüngremi ibaji sayutsü. Temeim nung Tsüngrem tashi lir. Na tangar den sendaktepdang ne taküm ajanga parnok dak temeim adokdaksütsü Tsüngrem dang asüngdang. Ne mulungjang nung tamang kinükji sayutsü Tsüngrem dang asüngdang. Nai tatok nüngdak angatetba jagi tangar aibilenjia parnok tim leman nung angatetdaksütsü. Khrista mesü na alitsü Tsüngrem dang asüngdang, idangji nai "Oba, parnok dang tai tokang" ta sarasademtetsü.

OLONG PAITEP # 5697



TIPILEN

- | | | | |
|----------------------------|-------|-----------------------------|-------|
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. _ _ _ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T _ _ _ lu | - (3) | 6. _ _ _ _ _ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa _ _ _ a | - (3) | 9. Küm kasa purtem | - (5) |
| 13. Ajungbena temulungjang | - (5) | 10. Tetsüng tajemetdak | - (6) |
| tongtonglatsü atu | - (5) | 12. _ _ _ _ adenshi | - (4) |
| 15. Tejen lai nung tesayur | - (5) | 14. Tsünösenbongtsü adokdak | - (3) |
| 16. Tsüngsak-mopung | - (5) | | |


LANGTSÜNGLEN

OLONG PAITEP # 5696 TELANGZÜBA

TIPILEN :

- | | |
|---|--|
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Taju, 21. Ano, 22. Onü, |
| | 23. Kua. |

LANGTSÜNGLEN :

Agüja aliba noksa nung meputepi
aliba 12 bushiang

TANÜBO NAI LANGZÜANG

Q. 'National AIDS Control Organisation (NACO)' indang headquarter kong lir?

- | | |
|--------------|--------------|
| 1. Mumbai | 2. New Delhi |
| 3. Hyderabad | 4. Kolkata |

===== (Taruba adok nung onoki langzütsü)

YASHI ADOK TELANGZÜBA : Beohar Rajendra Simha



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela
Tasoba Anogo

- | | | |
|------------------|---|-------|
| 1. Tenüng | : | |
| 2. Tasoba anogo: | : | |
| 3. Küm | : | |
| 4. Class | : | |
| 5. School | : | |
| 6. Talidak | : | |
| 7. Salem osang | : | |

NAI-A YA METETTER MA?

ALIMA NUNG JENJANG TULU AKETBA GEMSTONE KAR:

- | | |
|------------------|-------------------------|
| 1. Red Diamond | - \$1,000,000 per carat |
| 2. Taaffeite | - \$35,000 per carat |
| 3. Grandierite | - \$20,000 per carat |
| 4. Serendibite | - \$18,000 per carat |
| 5. Diamond | - \$15,000 per carat |
| 6. Alexandrite | - \$12,000 per carat |
| 7. Red Beryl | - \$10,000 per carat |
| 8. Musgravite | - \$6,000 per carat |
| 9. Benitoite | - \$4,000 per carat |
| 10. Poudretteite | - \$3,000 per carat |
| 11. Fire Opal | - \$2,300 per carat |
| 12. Jeremejevite | - \$2,000 per carat |



SUDOKU # 5738

TELANGZUBA # 5737

		3		1	5	7	9		8	4	9	2	7	1	6	5	3
	8	6			9	2		1	6	7	5	3	8	4	9	1	2
			2	6					1	2	3	6	5	9	7	4	8
9	2	4	6						7	8	2	9	3	5	4	6	1
		7	4	3	1	8	2	9	9	6	1	8	4	7	2	3	5
	1		9			6			5	3	4	1	2	6	8	9	7
7			5	9			8	2	3	9	7	5	6	2	1	8	4
	3	5		8	2				2	5	6	4	1	8	3	7	9
8		2		7	6	4			4	1	8	7	9	3	5	2	6

OJANG LUTEP # 5285

- | | | |
|---------------|---|----------------------|
| ÜBTSUBA | : | <input type="text"/> |
| MANGAPBO | : | <input type="text"/> |
| TEUTSÜTSÜBTEM | : | <input type="text"/> |
| EMBBILA | : | <input type="text"/> |
| KDA | : | <input type="text"/> |
| KAALA | : | <input type="text"/> |
| PESÜLATSA | : | <input type="text"/> |
| TESDANHISAGBA | : | <input type="text"/> |
| CHKEA | : | <input type="text"/> |
| RUMAR | : | <input type="text"/> |

OJANG LUTEP TELANGZÜBA # 5284

ASENI AGINÜBA AMA MERANGA INYAKER IBAJI
MATALOKRA ASEN TEZÜ ATANGER

TAN HOPTA ATEMA - KOMA SÜLA ?

Q. Asenok kidang kilir ayuba yimya ya anen nunga koma süla ?

Olong 20shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



New Delhi, January 17, 2021: Amongnū Ato kilonser, Narendra Modi-i video conferencing ajanga train ti tenzüksüdang New Delhi nung aliba Nizamuddin Railway Station nung Union Railway Minister Piyush Goyal, External Affairs Minister S Jaishankar aser Health Minister Harsh Vardhan nungeri wako ayipshiba noksa nung angur. Train ti ya Statue of Unity (Kevadia, Gujarat) nungi yimti balala tsüngda senzötsü.

Aluyimertemi 2024 küm tashi longkak aittsü renema lir: BKU

Nagpur, Aenjeti/January 17 (Agencies): Amongnū Bharatiya Kisan Union (BKU) lenir, Rakesh Tikait-i, Centre sorkari benokba özüng tasen asem anema aluyimertemi 2024 küm May ita tashi longkak aittsü renema dang lir, aser tang Delhi arrtsülen aluyimertemi longkak aitba ya aluyimertem tangatetba asüngsashi ka lir, ta ashi.

Nagpur nung osangbenertem senden ka nung jembidang Tikait-i, aluyimertem nem Minimum Support Price (MSP) agütsütsü ta sorkar nem onoki nangzükdaksüner, ta ashi.

Yaküm November 26 nungi tenzüka state balala nungi aluyimertem Delhi arrtsülen adenshia aluyimba özüng asemprong agientsü atema takhangba agüja arudar.

Özüng tasentem ajanga MSP agientsü aser Mandi system agienba ajanga aluyimertemi corporates matsüngdang takoksa angutsü, ta aluyimertemi tsübur.

Taoba Mongolbarnü Supreme Court-i Centre sorkar dang tetuyuba tasen ka magütsü tashi aluyimba dak sendakba özüng asempronglaji mebenoki atatsü atema oshidang agütsüogo aser Centre aser aluyimertem na tsüngda ken o bentettsü atema züngsem pezüi akümba committee ka tentettsüogo.

Tasüngdangba ka langzüdang Tikait-i, "Onoki 2024 küm May ita tashi mener longkak aittsü renema lir. Özüng asemprongla agientsü aser onok nem MSP agütsütsü atema onoki takhangba agütsür," ta

metetdaksü.

"Iba ya Delhi nungi aluyimertemi tangatetba asüngsashiba mapatong ka lir aser onoki tamakok mangutsü. Aluyimba özüng asempronglaji magien tashi yimdak aliba aluyimertemi onok yimdaki meyipa marudaksüner," ta paisa ashi.

"Sorkari tekong meranga özüng asemprongla ya magienner, anungji onoki mapang talangka longkak aittsü," ta Tikait-i ashi.

"SC-i sorkar dang aluyimba özüngtem mebenoki atatsü atema tuyubaji onoki pelaa agizüker, ajisüaka parnoki tentetba committee nung züngsemtemji aluyimba özüng tasen pusemertem dang lir," ta pai ashi.

Norway linük nung atalokbaji shisadangtsüla: Manish Tewari

New Delhi, January 17 (Agencies): Norway nung Pfizer-BioNTech mRNA vaccine agiba sülen shiranger tain 23 asüba nung ajemdaker Congress lenir, Manish Tewari-i twitter ajanga Union Health Minister, Harsh Vardhan dang, pai benokba tebilemtsü ya pa nija tebilemba masü saka atangji atalokba lir, ta metetdaksü.

Union Health Minister, Vardhan-i, Congress-i melung malemtsü o aser olulu proktsü

dang jangrar, ta jembiba sülen Tewari-i iba telangzüba agütsü.

Harsh Vardhan-i twitter ajanga, "Nü tenük lapokang, doctor tem aser sorkar ketdangsertemi iba vaccine agiba noksa lemsateper," ta metetdakja liasü.

Norway nung shirangertem asüba tetshia Congress lenir, Tewari-i, "Iba ya tsübudaksütsü atema masü. Norway nung kechi atalok, ibaji shisadangang," ta metetdaksü.

India nung yangluba vaccine Covaxin amshitsü atema emergency use authorization (EUA) agütsüba atema Tewari-i aiben aija arur.

Tewari dang masü saka Congress lenirtem- Anand Sharma, Jairam Ramesh aser Shashi Tharoor nungeria Drugs Controller General of India's (DCGI)-i Bharat Biotech-i yangluba COVID-19 vaccine amshitsü atema temelaba agütsüba ashishia jembiogo.



Shimla, January 17, 2021: Amongnū Shimla nung Panchayat election agidang nisungtem vote agütsütsü atema tetsüngda itter tarensena nokdaka aliba noksa nung angur.

Republic Day nü aluyimertemi Delhi nung tractor rally agitsü

New Delhi, January 17 (Agencies): Tang linük nung longkak aiter aluyimertemi January 26 nü tractor rally agitsü aliba sentong methitemtsü, ta metetdaksüogo.

Aluyimertemi Republic Day nü Delhi Outer Ring Road nung tractor rally agitsü, ta activist, Yogendra Yadav-i osangbenertem senden ka nung metetdaksü.

"Republic Day nü onoki Delhi nung aliba Outer Ring Road nung tractor parade agitsü, ajisüaka onoki iba sentong süngjema agitsü aser Republic Day parade nung timtem magütsütsü. Aluyimertemi peipei tractor nung linük wako asongtsü," ta pai metetdaksü.

Ano aluyimertem lenir, Darshan Pal-i, iba anogo nungji longkak aitba nung shilem agitsüpurtem aser iba sentong pusemertem anema National

Investigation Agency (NIA)-i ken o benoker, ta ashi.

Taoba hopta Centre sorkari Supreme Court dang Republic Day nü aluyimertemi tractor rally agitsü aliba sentongji nokdangdaksüner, ta mepishia liasü. Iba ken o ya court nung benoka lir aser January 18 nü angadangtsü.

Tan ita tetenzüklen osangbenertem den jembidang aluyimer lenirtemi, "Onoki tesünep nung longkak aittsü aser onoki sorkar dang özüng asemji agienang mesüra tashiyim amshia onok arrtsülen nungi mindokang ta shiogo. Telemtetba agia inyaksü atema mapang tongogo aser onoki January 26 anogo ya shim, kechiyong Republic Day ya ajanga nüburtem tashi sayur," ta metetdakja liasü.

Centre aser aluyimertem tsüngda maneni January 19 nü senden amentsü sentong lir.



Lucknow, January 17, 2021: Honibarnü Lucknow nung aliba Balrampur hospital nung medical nisung kati frontline worker ka nem Covishield vaccine tutsüba noksa nung angur.

Shiv Sena-i West Bengal Assembly election nung tokteptsü

Mumbai, January 17 (Agencies): West Bengal nung Assembly election agitsü mapang ana nung lia Amongnū Shiv Sena-i iba election nung tokteptsü, ta sangdongogo.

Twitter ajanga Shiv Sena lenir, Sanjay Raut-i party-i West Bengal assembly election nung shilem agitsü telemtetba agiba metetdaksü.

Maharashtra Chief Minister aser party tongti, Uddhav Thackeray den o lemtepbba sülen Amongnū pai twitter ajanga, "Mapang talangka nungi yongyaa aliba osang sangdonger. Party tongti, Uddhav Thackeray den o lemtepbba sülen Shiv Sena-i West Bengal Assembly Elections nung shilem agitsü telemtetba agiogo. Kobi melii onok Kolkata tonga arutsü!! Jai Hind Joy Bangla (Bengali)," ta metetdaksü.

Ajisüaka iba election nung party-i menden kwi nungi tokteptsüar pai memetetdaksü.

Menden 294 aliba assembly election ya taküm April-May ita nung agitsü. Tang Maharashtra state nung Shiv Sena-i aniba Maha Vikas Aghadi teloktep sorkar lir; iba teloktep nung NCP aser Congress party na densema lir.

West Bengal election nung Left Front aser Congress nati longjemer BJP aser Trinamool

Congress na den tokteptsü ta sangdongogo; ano külen Trinamool Congress-ibo BJP anema Left Front aser Congress teyari aginer.

Congress state Tir, Adhir Ranjan Chowdhury-i, par party aser Left Front nati senden ka mena party ana tsüngda menden lemsatsü ta metetdaksü.

Left Front chairman, Biman Bose-i, linük nung tsükchir tulutibaji BJP lir, ajisüaka West Bengal tensa nung ajemdaker onoki Trinamool Congress anema-a tokteptsü, ta metetdaksü.

Lok Sabha nung MP aser state Congress Tir, Chowdhury-i, "Telemsa adokdaksüba BJP aser fascist TMC naprong tamakok ngudaksütsü atema onoki democratic teloktep ka ama longjemer tokteptsü," ta metetdaksü.

Congress aser Left napronglai ayongzükbba osangbenertem senden nung Bose-i, "State aser linük nüburtem kümzüksü atema Left aser Congress nati lokteper tokteptsü. Menden lemsaba onük nung Left Front aser Congress na tsüngda mangatettep mali," ta metetdaksü.

2016 küm West Bengal assembly elections nunga party anati lokteper toktep saka party ana senteper menden 76 dang ngua liasü.

Indonesia menoknok nung asür nisung 73 jungogo



Jakarta, Aenjeti/January 17 (Agencies): Hokulbarnü Indonesia indang West Sulawesi province nung menoknok anakba sülen nisung 73 süogo, ta disaster mitigation agency (BNPB) ajanga Deobarnü ashi, koba Southeast Asia linük nung lendong tesashi atalokyonga aruba rongnung ibai tesüsaba alitsü.

Menoknok asadangba magnitude 6.2 anakba lendong nung nisung 820 dak tema yiru aser ano nisung 27,800 dak tali pei aliba ki yutsür ainshiogo, ta BNPB odongtar Raditya Jati-i ashi. Nisung kar tenem nung jenoka lir aser kar evacuation centre sünga adenshia lir, ta ashir.

Region tesem balala nung osettsüset auyaba mittsü

atema police aser mitkartem yoka lir, ta Jati-i ashi.

Timtem nung alirtem yaritsü asoshi hopta ana atema emergency response status tem amenoka lir, ta pai ashi.

Indonesia indang meteorological, climatology and geophysical agency (BMKG) tekolakba, Dwikorita Karnawati-i ashiba agi, iba region nung ano menoknok ka dang anak nung tsunami adokdatsütsü.

Pacific Ring of Fire ta nüngja agütsür alidak, Indonesia nung mapang shia menoknok agi kongshir. 2018 küm menoknok 6.2-magnitude anoka iba sülen tsunami agi Sulawesi nung aliba Palu nung kongshia nisung meyrirjang aika takum samatsü.

Küm tasen tenzüker hopta anabuba nung mejakloker aodang alima nung nütsüng timtiba aliba linük pezübuba nungya alimar lendong tabu balala agi sünga lir.

Tain ita North Sulawesi aser South Kalimantan province nung tzümetsüng agi nisung ter shi takum agiogo aser ano West Java province nung anentsüh alua nisung 29 anenbang, ta ketdangsürtemi ashir.

January 9 nü Sriwijaya Air indang tayimtsü ka nung nisung 62 mener Java Sea nung tsüoka liasü.

Honibarnü East Java indang Semeru tenem pokteta adok saka yangji asü-amaba osangbo mali.

Ano maneni yipru tesashi arutsü amai takzüteta lir, ta Dwikorita-i ashi.

Kabul nung Supreme Court obendanger tetsür ana khaset

Kabul, Aenjeti/January 17 (Agencies): Deobarnü anepdang nisung kati Supreme Court nung inyaker Afghan tsür obendanger ana khaset, ta ketdangsür osang ka ajanga metetdaksü.

Taliba aser sorkar na tsüngda tang yimjung atema sensaksemba mapang Afghanistan nung ita tsüngda azütokshi tali kümogo aser talisa Kabul nung tongtiban nisungtem aika maka arudar aser iba ajanga tetsübu aitdaksüogo.

Anogo ana tejakdang Pentagon-i, Afghanistan nung US sepaitem 2,500 dang toktsütsü sangdongba sülen tang iba lendong atalokogo.

Obendanger ana ya court indang gari ka nung mener office-i oya aliba mapang amak, ta Supreme Court otongdar Ahmad Fahim Qaweem-i ashi.

"Tia maka tanü tetsür obendanger ana taküm samaogo. Tena anir oya alisanga yirur lir," ta Qaweem-

i AFP dang ashi.

Linük nung okadak tongtiba nung tetsür obendanger 200 dak tema lir, ta otongdarisa ashi. Kasa mapang nung Kabul police-ia iba osang jangjatsüogo.

Afghanistan indang Supreme Court-a 2017 küm February ita amak. Pei temang nung bomb alenoker pokdaksürtemi okadak mapa inyaktertem telok ka anasa bomb pokdaksü aser nisung 20 tepsetba den nisung 41 yiruja liasü.

Tawa yimden yimsüsür, osangbener, activist, doctor aser prosecutor tem aika Kabul aser tanga yimtem nung maka tepseta arudar.

Afghan ketdangsürtemi lendong atalokbatem Taliban dak tongloktsüogo, koba parnoki magizüki arudar.

Lendong atalokdaksüba ya karbo Islamic State group temi nangzükogo.

Iba ita tetenzüklen mapang talangka sülen US military-i lendong balala atalokba Taliban

dak tongloktsüogo.

"Talibai menanzüki tesem aika amakba aser sorkar ketdangsürtem, lokti tentet balala lenirtem aser osang benertem amakba ajanga yimjung bener marutettsü," ta Afghanistan nung US sepai otongdar Colonel Sonny Leggett-i tweet asü.

Taliban aser Afghan sorkar na Doha nung yimjung atema jembishinüaka azütokshi taliang kümogo.

Taliban-i 2020 küm tesem 18,000 dak tema makogo, ta Afghanistan, spy tekolakba Ahmad Zia Siraj-i iba ita tetenzüklen ozüng yanglurtem dang ashi.

Hokolbarnü Pentagon-i, 2021 May ita tashi nungbo sepaitem tashi ajemtsütsü ta nangzükteper aliba ama Afghanistan nung sepai 2500 dang toktsütsü ta shiogo.

Security tsütsü timtem magütsütsü aser Afghan sorkar den yimjung atema sensaksemtsü tenangzükteperba nung iba jenjang agi.

UK-i G7 nung adentsü PM Modi jaok

London, Aenjeti/January 17 (Agencies): United Kingdom-i, Ato Kilonser Narendra Modi G7 summit nung adentsü jaokogo, koba June ita Cornwall tesem nung agitsü.

G7 kong UK, Germany, Canada, France, Japan, Italy, USA aser European Union densema lir parnoki coronavirus wara, tzü-mopung melenshiba, technology tsütsü temelenshi, scientific discoveries aser open trade onüktem benoka sensak asemtsü.

UK Ato Kilonser Boris Johnson-i Republic Day sentong nung adentsü atema India sendangtsü liasü saka par linük nung coronavirus tashidak tapu tasen ka potetba sülen sentong melenshiogo, saka pai G7 senden mamen tsüngda India sendangtsü akok.

India dak alia iba senden nung shilem agitsü atema Australia aser South Korea nata jaokogo.

India, Australia aser South Korea jaokba ajanga tesendaktep tajungba kuma yanglushitsü atem UK

bendanga agütsür aliba sayur.

Johnson-i, G7 yagi mapang talangaka alima nung tetsükdaksü tulu ajurubatem bentettsü atema jenajang balala agibtsü asoshi telemtetba agia aruogo, ta ashi.

"Tang renloka oya aliba linüktem indang sentsü aodoktsüba den Russia-i Crimea atsingba aitsüba amala jenjang agiba ajanga alimai G7 dak onok shisatsü lemsa alima tajungba ka yanglutsü atema rangloker aruogo," ta pai ashi.

"Küm tem tsüngda coronavirus ajanga asenok dak tamajungtiba kongshiogo aser alima tasenba atema tetendangba tulu ka asenoki ajangshiogo. Ajaki longjemer sadok sadoka alima tajungba ka atema inyaksüji kanga tim," ta paisa ashi.

India Republic Day parade nung tongti tesemdanger asütsü atema Modi-i jaokba Johnson-i agizük, ajisüaka par linük nung tashidak tasen ka poktetba ajanga linük ajunga mokdanga ayuba sülen iba sentong thitsütsüsa aküm.

Biden-i Trump indang sentong kar melenshitsütsü



Washington, Aenjeti/January 17 (Agencies): US tir inyaksü shimteta alisang Joe Biden office nung mener mezüng anogo executive order kar agütsütsü sentong lir, aser item rongnung Muslim nunger timba sür aliba linüktem nungi US-i arutsü nokdanga aliba agentsü dena lir.

Biden indang White House chief of staff inyaksü shimteta alisang Ron Klain-i memo ka Honibarnü prokshiba nung, tir tasenba office nung mener mezüng anogo ter tsüngta US Tir Donald Trump-i benoka amshiba sentong aika US administration tasenba ajanga melenshitsü, ta shia lir.

Item rongnung coronavirus tasenba nungdaksü atema mera agibatem, Paris climate change accord nung tanaben adentsü aser nisung million aika nem senso agütsütsü mela immigration legislation yanglutsü dena lir.

2017 küm tir menden nung mener mapang tatsüka lir Trump-i executive order ka agütsüba nung Muslim nunger timba aliba linük tenet nungi United States-i aitiba nokdanga liasü.

Iba totuyuba ya ishiben melenshia liasü aser iba indang version ka bo 2018 küm Supreme Court ajanga temeden agüja liasü.

Iba tenokdangba ya mela

mela agentettsü kechiaser ibai executive order aser presidential proclamation ajanga agütsüba lir, saka conservative opponent tem nungi ken o benoka menudaksütsü akok, ta teshisadanger temi ashir.

"Tir ka ama asen lokti nungi tesempatep miim agentsü atema nenok den külemi inyaka nenoki shilem agiba akhumtsüputsü aser nenok shisatsü bushitsü. Kü indang administration ya Muslim America nunger jenjang ajunga nung tenzükba America nunger ama asütsü," ta Biden-i October ita shia liasü.

Iba den tashidak wara dak sendakba nung tesem balala azüngtetdaksüba, student loan meyipa agütsütsü mapang atsilangtsü, federal property aser state telungzük nung senzür ajunga mask agidaksüba aser immigrant tanurtem parnok tsürabur nungi piladaksür aliba tanaben lungjemaksütsü asoshi lenmang bushiba dena lir, ta memo ajanga ashi.

Biden-i tang linük nung kuli tejangja melie nisung million 11 telidakpur nem temeden agütsütsü atema temzüng tasen yanglutsü aser pai office agizüker mezüng anogo 100 nung nisung million 100 nem mozü agütsütsü nangzüka aliba densema lir.

5,000mAh Battery aketba Oppo A93 5G sayaogo



New Delhi, Aenjeti/January 17, 2021 (Agencies): China nung Oppo-i parnok indang A-series smartphone lineup atsülangtsütsü nükjidong nung Oppo A93 5G sayaogo. Taoba hopta Vivo Y31s sayaba sülen, tang brand ajanga Oppo A93 5G sayar alitsü, kong Qualcomm Snapdragon 480 SoC den 5G connectivity densema lir.

Oppo smartphone tasenba nung tongtibang feature temji 48-megapixel primary camera aser 5,000mAh battery na alitsü, koba storage model ana aser sentsü tapu asem nung angutsü.

Design tsütsü reprangdangra, Oppo A93 5G nung 6.5-inch full-HD+ (1,080x2,400) LCD display den selfie atema tejaklen hole-punch cutout dena lir. Iba display panel nung 405ppi pixel density aser 480 nits brightness den 90Hz refresh rate inoka yanglutsüogo. Phone nung Snapdragon 480 chipset den 8GB RAM aser 256GB storage angutsü. Smartphone tesülen camera ya rectangular module alitsü, koba metongi inoktsü aser LED flash ka densema lir.

Oppo A93 5G indang triple camera setup nung 48-

megapixel primary camera den f/1.7 aperture, 2-megapixel macro camera den f/2.4 aperture aser tanga 2-megapixel monochrome camera den f/2.4 aperture angutsü. Selfie aser video calling atema, phone tejaklen 8-megapixel den f/2.0 aperture keta lir. Tejaklen aser tesülen camera anaprongla yagi 30fps nung full-HD video tangokteter. Camera inyakyim nung yarisemtsü atema, camera app talisa panoramic, portrait, time-lapse photography, slow motion, super text, sweep aser tanga balala angutsü.

Oppo A93 5G nung tanga tongtibang feature rongnung 3.5mm audio jack, Bluetooth 5.1, Wi-fi aser Android 11-based ColorOS 11.1 out of the box inoka yanglutsüogo. Smartphone nung aliba 5,000mAh battery yagi USB-C port ajanga 18W fast charging support asütsü.

China nung Oppo A93 5G - 8GB + 256GB storage model jenjang CNY 1,999 (sen 22,500) alitsü, saka 8GB + 128GB storage variant atema jenjang memetetdaksü. Oppo A93 5G ya Silver, Black aser Aurora sentsü nung angutsü.

Skoda Auto India-i Laurin aser Klement sayaogo



New Delhi, Aenjeti/January 17, 2021 (Agencies): India shishilembadak Skoda Auto India-i Superb sedan range tasen - SportLine den külemi Laurin & Klement sayaba sangdongogo. Iba model jenjang sen lakh 31.99 aser lakh 34.99 (ex-showroom) alitsü.

2004 küm mezüng sayaba Superb model tasenba nung design, feature aser cabin design tasen angutsü.

"Shishilembadak ŠKODA SUPERB sayar külen nungi segment nung jenjang ka ajangzüktetta arudar. Gari design aser interior tajung den aküm taket lir aser India nung luxury gari meimertemi sapur. Iba model sapurtem tali atsüa arutsü atema ŠKODA SUPERB tasenba nung feature aika melenshitsüogo," ta Zac Hollis, Brand Director, ŠKODA AUTO India-i ashi.

ŠKODA SUPERB nung design aser technology tsütsü temelenshi aika angutsü, kong headlight anaprongla radiator grille den külemi yanglutsü, LED

day time running lights den illuminated LED eyelashes aser 'coming / leaving home' function den LED turn indicators tem standard ama angutsü.

Iba model nungsa adaptive front-lighting system inoksema yanglutsüogo. Gari nung mode talisa city, inter-city, motorway aser rain angutsü. Ano külen, gari nung AFS system yagi headlamp swivelling aser cornering functions den bendenloksema dynamic headlamp inclination control achaayangtsür.

Gari cabin nung 20.32 cm floating capacitive touch display den proximity sensor, koba glass design aser user interface tasen keta lir. Entertainment atema gari nung Amundsen Infotainment System den inbuilt navigation angutsü, koba Czech automotive manufacturer ajanga yanglutsü.

Superb nung SmartLink™ technology talisa ŠKODA connectivity - MirrorLink™, wireless Apple CarPlay aser Android Auto dena lir, koba

smartphone teyari ajanga connectivity agütsür. Iba den külemi, Smartlink yagi voice command control, 'Type C' USB ports, Bluetooth® GSM telephony aser audio streaming support asür.

Gari telung nung Piano Black sentsü alitsü. Laurin & Klement edition nung Stone Beige mesüra Coffee Brown den leather upholstery meyoktepa yanglutsüogo. ŠKODA SUPERB SportLine nung Carbon décor, spoke flat bottom SuperSport multifunction steering wheel den paddle shift, SportLine inscription aser black Alcantara® Sports Seats den integrated headrests inoka yanglutsüogo.

Standard feature ama, ŠKODA SUPERB nung Virtual Cockpit ka dena lir, kong customizable digital instrument panel angutsü. Tanga feature rongnung 360° Surround Area View, tejaklen grill nung wide angle camera pezü aser wing mirror cover dena lir.

ALI AYOKTSÜ LIR

Hozukhe village, Foothill Road nungi minute 4 pilar. Sq.ft - Rs 15/- # 6909596955 / 8974869756

Shahid indang 'Jersey' November 5 nü sayatsü

Mumbai, Aenjeti/January 17, 2021 (Agencies): Shahid Kapoor indang taruba sports drama - Jersey sayatsü atema anogo sangdongogo. Taoba küm Covid-19 wara adokba mapang iba film tangokba maparen tembanger sülen, film yanglurtemi iba film ya taküm Diwali (November 05, 2021) mapang sayatsü terenemba lir.

Shahid, Mrunal Thakur aser Pankanj Kapur nungeri shilem agiba Jersey film ya Gowtham Tinnanuriha-i direct süogo. Iba film ya Telugu indang box office nung takok anguba film - Jersey nung ajemdaker yangluba bollywood film ka alitsü. Telugu version nung Nani aser Shraddha Srinath nati tongti shilem agir.

"November 05, 2021 nü DIWALI benjungmung mapang JERSEY film sayatsü. TEAM den külemi iba maparen tenzüker nungi tatem tashi parnok ajaki temulung

agüja inyaka aruogo. Iba takok asoshi team pur dang pelaba metetdaksür," social media sabang ajanga Shahid-i lemsatep.

"Küm nung ajak longjema amungba benjungmung tulutiba rongnung Diwali ya alitsü aser 'Jersey', koba family sports drama ka lir, iba benjungmung sayatsü asoshi mapang tetemjen ka asütsü," ta film producer Aman Gill-i ashi.

Jersey ya Allu Aravind-i present asütsü aser Gowtam Tinnanuri-i direct süogo. Kasa mapang, Gill, Dil Raju aser S.Naga Vamsi longjemer iba project produce asü.

Iba film ya Cricket asayatsü sempet tajung alir nisung ka saka wadang tsütsü pai takok mengutetba otsü ka alitsü. Pa 30s mapang India cricket team tenüng nungi asayatsü kanga jangrar aser par jabaso nem sempet ama jersey ka agütsütsü asoshi temulungtetba nung inyaker.

Padma Vibhushan award angusang Ustad Ghulam süogo



Mumbai, Aenjeti/January 17, 2021 (Agencies): India nunger classical musician aser Padma Vibhushan award angur Ustad Ghulam Mustafa Khan, Deobari anüngdang par kidang asü. Pa arishi küm 89 liasü.

Khan'er jabaso kinungtsü Namrata Gupta Khan-i, Bandra nung pa alidak anüngdang 12: 37 ako meta asü ta PTI dang ashi. "Tanep pa junga dang liasü. Kidang nurse temi pa metoktsüi anepalur. Temang nemshitsüba mapang, pa saksü aser aritepa pa yaritepdang pa tenük shibangadok aser tango melungi agia liasü. Ni doctor tem ajatsü merandang aser parnok tonga arudangbo, pa süadok," ta Namrata-i ashi.

Khan ajungbena süadokba osang angazüka kinungertem kanga aoksadok. Taküm March 03 nü musician Khan ya arishi küm 90 ajungtsüba liasü. 2019 küm Khan brain stroke asü aser pa temang abilen shilem paralyse kümadok. Namrata-isa Khan asüba osang Facebook page nung lemsatepa liasü.

"Kü kinungbo tebu aser linük nung musician mongin, Padma Vibhushan -Ustad Ghulam Mustafa Khan sahab asüba osang jashiseta lemsateper," ta Facebook nung lai lemsatep.

Deobari nikongdang Santacruz Kabrastan tesem nung Khan den asü pila sentong agiogo. March 3, 1931 küm Badaun, Uttar Pradesh nung Khan aso, adianu (tebur pezü aser tetsür asem) rongnung pa tambusang liasü. Khan tebu Ustad Waris Hussain Khan ya nüngtugu musician Ustad Murred Baksh'er jabaso liasü. Ano külen, Khan tetsü Sabri Begum ya Rampur-Sahaswan gharana ngutetsang Ustad Inayat Hussain Khan'er jala lir. Khan-i classical music training ya tebu dang nungi mezüng angazük aser tesü par kinunger Ustad Nissar Hussain Khan kübok music angazüka liasü.

1991 küm Khan nem Padma Shri award agütsü, iba sülen 2006 aser 2018 küm pai Padma Bhusan aser Padma Vibhushan award angu. Award ana ya mangdang, 2003 küm pa nem Sangeet Natak Akademi award agütsü, koba India nung artistes nem agütsüba sempet rongnung tematiba alitsü.

Khan asüba osang angazüka, nüngtugu kentener Lata Mangeshkar aser music composer AR Rahman densema Indian music industry nungi tongtibang nübu aikati pa nem akhüm agütsüogo.

Syed Mushtaq Ali Trophy: Nagaland-i Mizoram kokogo



Dimapur, Aenjeti/January 17 (TYO): Tang asayaa aliba Syed Mushtaq Ali T20 asayamung nung January 17 nü Nagaland aser Mizoram na asaya Nagaland-i run 77 agi kokogo.

Toss akokba sülen Nagaland team-i mezüing bat asütsü shim aser parnoki over 20 nung asayar 6 out ser run 178 yanglu.

Nagaland team batsmen

tem rongnungi Jonathan Rongsen-i run 51, SS Mundhe-i run 32, Chetan Bist-i run 30 aser Joshua-i run 16 yanglu.

Mizoram bowler tem rongnungi G Lalbiakvela-i wicket 2, Pratik Desai-ia wicket 2 aser Bobby-i wicket 1 agi.

Asaya tanabuba shilem nung Mizoram team-i over 19.1 nung asayar ajak out ser run 101 dang yangluteta asaya

makok.

Parnok rongnungi Amatea-i run 39 aser KB Pawan-i run 25 yanglu.

Nagaland team asoshi Nagaho Chishi-i wicket 3, Khrievitso Kense-i wicket 3 aser Stuart Binny, Hopongkyu aser Hem nungeri wicket kaka agi.

Nagaland team taruba asaya Manipur den January 19 nü anüingdang 12:00 ako nung tenzüka asayatsü.

Marin aser Axelsen nati Thailand Open kija asaya kokogo

Bangkok, Aenjeti/January 17 (Agencies): Deobarnü Bangkok nung Thailand Open tetsür kija asaya final nung reigning Olympic champion Carolina Marin-i top seed Tai Tzu Ying koka, Tokyo nung la title defend asütsü atema jenjang junga yangluogo.

Kasa mapang nung kasa asayamung tebur kija asaya nung Denmark nunger asayar Viktor Axelsen-i Hong kong nunger asayar Angus Long koka iba asayamung straight set nung kokogo.

Spain tsür arishi küm 27 tain Marin-i tetenzük nungi net nung kanga sangra asayaba den smash kanga junga züka asaya.

Lai final asaya nung arishi küm 26 tain Taiwan tsürla ya 21-9, 21-16 agi minute 42buba nung akok.

"Ni tetenzük nungi ni asaya kokner ta la dang sayunüa liasü," ta Marin-i ashi.

Tai-i, lai Marin menepa masayatet aser lai asayanüba ama masayateti liasü, ta ashi.

"Carolina-i teti kanga kara aser aggressive süa asayar. Ibaji la asayaba yimya. Tanü lai ni kanga nongshia liasü," ta Tai-i ashi.

Asia tsür masürtem rongnungi mezüingbuba Olympic badminton gold akokla Marin, 2019 küm January ita temekok yiruba sülen mapang talangka timtema arur Tokyo nung Olympics asayatsü ana nung lai la temang tajungba kümogo.

Kasa mapang nung Axelsen-i 21-14, 21-14 agi Long madak minute 44 nung takok angu.

"Ni final nung 110 percent agütsütsü nüngdaker ta meteta liasü. Mapa talangka masayai arur asaya akokba atema kanga pelar," ta Axelsen-i ashi.

Tamakok nguaka final tonga asayatetba ajanga kanga süngmaner, ta Long-i ashi.

"Ni junga masayatet aser tanü 70 per cent shi dang asayatet südi," ta pai ashi.

"Iba asayamung ya 2021 atema mezüingbuba asayamung lir aser ni final tonga asayatsü imlaa maliasü," ta paisa ashi.

March ita tom nung All England Badminton Championship akokba sülen Axelsen-i tang agi asayamung tanabuba atonga kokogo.

Bangkok nung asayamung ishika asayatsü aliba rongnung

Thailand Open ya mezüingbuba lir aser tatemsa January 27 nü nungi World Tour Finals tenzütsü.

Maneni tetsür tarep final asaya nung Indonesia tsür Greysia Polii aser Apriyani Rahayu nati 21-15, 21-12 agi Thailand tsür Jongkolphan Kititharakul aser Rawinda Prajongjai na kokogo.

Tarep temeyoktep asaya nung top-seeded Thais Dechapol Puavaranukroh aser Sapsiree Taerattanachai nati Indonesia nunger tarep Praveen Jordan aser Melati Daeva Oktavianti na mezüingbuba set minute 8 nung 21-3 agi akok.

Tanabuba asaya kanga toktepa asayaba sülen 20-22 agi Jordan o Melati nati akok saka tatembangbuba set nung Puavaranukroh aser Sapsiree nati 21-18 agi asaya koka liasü.

Tebur tarep asaya nung Taiwan nunger tarep Lee Yang aser Wang Chi-Lin nati Malaysia nunger Goh V Shem aser Tan Wee Kiong na 16-21, 23-21, 19-21 agi kokogo.

Taruba asayamung Mongolbarnü nungi tenzütsü.

Sports Ministry-i SAI facility tem asayartem tenüing nung jatsütsü lemtet

Aenjeti/January 17, 2021 (Agencies): Sports Authority of India (SAI) indang facility tasentem aser yanglushibatam ajak nüngtugu asayartem shimoki linük asoshi naroküm bener arutsüogo, parnok tenüing nung jatsütsü telemtetba agiba Sports Ministry-i Deobarnü metetdaksüogo.

Linük atema saisapong balala nung naroküm bener arutsü tem tushitsü atema iba jenjang agi, ta SAI-i ashi.

Mezüingbuba shilem nung National Centre of Excellence (NCOE) Lucknow nung tawa yangluba air-conditioned wrestling hall aser learners swimming pool, NCOE (National Centre of Excellence) Bhopal nung yipden 100 aketba

hostel, NCOE Sonepat nung multipurpose hall aser tetsürtem hostel aser iba den Guwahati SAI Training Centre tasenba, kong hostel, multipurpose hall aser staff quarters densema lir item tesemtem ya nüngtugu asayartem tenüing nung jatsütsü.

Iba telemtetba indang jembidang Sports Minister Kiren Rijiju-i, "linük nung saisapong sobaliba ka yangertsü atema linük nungi asayartem nem parnoki langa aliba ama tetushi agütsütsü kanga tongtumbang, kechiyong iba jenjang ya agi nungdang saisapong ya career ama agitsü lanurtem ajungmesotsü," ta ashi.

Ajisüaka ministry-i tetushi

agütsütsü aliba asayartem indang tenüing memetetdaksü.

"Sorakari tang asayartem aser taoba mapang asayartem nem parnok taküm anisüngzüka alitsü atema takokba tashi teyari agütsüdar," ta Rijiju-i ashi.

"Parnoki saisapong nung teyari agütsüba atema saisapong facility tem parnok tenüing nung jatsüba ya asayartem ajungkettsü atema sorkar bendanga agütsür aliba jenjang ka asütsü," ta paisa ashi.

Linük nung saisapong facility tem ishika dang nüngtugu asayartem tenüing nung jatsür lir aser iba ajanga parnoki ajangzüktetbatem nüburtem nem metetdaksütsü asoshi ya teperia asü masü ta atsütepa aruogo.

1buba Late G. Rio Memorial asayamung ayonger

Dimapur, Aenjeti/January 17 (TYO): Mezüingbuba Late G. Rio Memorial U-19 (Boys) Inter-District Tournament

January 18 nü nungi tenzütsü.

Iba asayamung ya Nagaland Cricket Association-i ayongzüka asayatsü.

January 18 nü mezüingbuba

asaya Dimapur aser

Mokokchung na 7:30 ako nungi

tenzüka asayatsü aser

tanabuba asaya Kohima aser

Tuensang na 11:45 ako nungi tenzüka Nagaland Cricket Stadium, Sovima nung asayatsü.

Nagaland Cricket Stadium Gate No-2, terprangertem atema lapoka toktsütsü, aser asaya angati agi reprangdaksütsü.

Kasa mapang nung asayamung indang Live score tem crickheroes.in nung angutsü.

Australian Open renema aliba ama asayatsü

Melbourne, Aenjeti/January 17 (Agencies):

Australian Open tekolakba Craig Tiley-i Deobarnü ashiba agi, renema aliba ama

Australian Open taruba ita nungi asayatsü. Paisa, asayar 47 pei hotel takdang nungi mainshidaksüi tokja aliba ya ken o tulu ka masü, ta ashi.

Honibarnü asayar aser staff tem Melbourne o Adelaide-i anir aruba charter flight 17 rongnungi ana nung nisung asem dak Covid-19 tashidak potetba sülen mepetmesü adok.

Los Angeles nungi kasa tayimtsü nung mener aruba broadcast team züngsemka daka Deobarnü tashidak poteta liasü.

Tashidak potetertem rongnung asayar ka danga mali, ajisüaka Canada nungi 2019 US Open winner Bianca Andreescu indang coach Sylvain Bruneau densema liasü. Ano coach tanga ka daka tashidak potetogo.

Tayimtsü nung mena alirtem ajak ya close contact tem ta züngshir aser parnok ajak anogo 14 pei hotel takdang metoktsütsü atema tetuyuba agütsüogo.

Iba tetezü asayar 47 ya anogo nung ghonda pongu training agitsü atema temelaba agütsür aliba nung shilem magitettsü.

Asayartem rongnung Victoria Azarenka, Sloane Stephens, Kei Nishikori aser Angelique Kerber nunger iba ajanga kongshiogo.

"Wara süshia mao asünung lendong lir ta onoki meteta liasü, kechiyong kechi ataloktsü memetet," ta Tiley-i Channel Nine television dang ashi.

"Ajisüaka Australian Open renema aliba ama asayatsü aser jenjang tamajung ka nung

aliba asayartem atema onoki takoktashi jenjang tajungtiba agitsü," ta pai ashi.

Adelaide-i aruba tayimtsü ana rongnung ka nung tongtumbang asayartem densema liasü ta olulu osang prokshiba asayamung ayongertemi jangjashitsüogo.

Asayartem timba Melbourne nung anen saka nüngtugu asayar Novak Djokovic, Rafael Nadal, Serena Williams aser Naomi Osaka nunger Adelaide-i ao.

Sorana Cirstea aser Belinda Bencic nunger densema asayartem aikati training magitetba atema ashishiogo aser parnok rongnung karibo, nisung ka dak danga tashidak potetra parnok sabanga ayutsü ta mashi ta shiogo.

"Parnoki jelia tetuyuba agütsür ali asübo ni Australia nung masayala," ta Romania nunger Cirstea-i ashi aser Kazakhstan tsür Yulia Putintseva-ia, "ni yagi maru tsüngda tanaben bilemshitsü," ta ashi.

Tiley-i ashiba agi, inyakyim ya tasak lir saka parnok nem angatetdaksüogo.

"Onoki mezüingyongi jangja jangja metetdaksüogo aser ibayongji asayartem telok balala küma lemsatsü. Nisung kar dakbo tashidak poteta anogo 14 lokti nungi pilaa alitsü ana nung liasü," ta pai ashi.

Tiley-isa, iba timtem ajanga kongshir aliba asayartem nem parnok takdangi exercise equipment bener yoktsü atema pai takok tashi inyakdar ta ashi.

Roger Federer yirua masayatettsüsa akümba aser world number 16 Madison Keys o Andy Murray nadaka coronavirus tashidak potetba sülen Australian Open asayamung dak kongshir liasü.

BILEMDANGANG

"Minyakdangra takok tamakok mejangjatsü."